

Kalaallit Nunaanni inatsisinik atuutsitsinermit tunngasut Danmarkimisut pitsaassuseqalernissaat qulakkeerniarlugu qanoq siuarsarneqarnissaannut apeqquteqaat aallaavigalugu oqallinnissamut siunnersuut.

(Inatsisartunut ilaasortaq, Debora Kleist, Inuit Ataqatigiit)

Akissuteqaat

(Isumaginninnermut, Ilaqutariinnut, Naligiissitaanermut Inatsisinillu Atuutsitsinermit Naalakkersuisoq)

Apeqquteqaat aallaavigalugu oqallinnissamut suliaqarsimasoq Inatsisartunut ilaasortaq Debora Kleist qujassuteqarfigissavara.

Inatsisinik atuutsitsinermit pissutsit tutsuiginartut inuiaat nutaaliaasut inatsisitigut illersugaanerannik pingaartitsiffiusumi pingaarutilimmik tunngaviupput. Taamaattumik oqallinnermut matumunnga suliniuteqartoqarsimanagera Naalakkersuisut iluaraat. Inuiaat inatsisitigut illersugaanerat kivisinnaajumallugu inuiaqatigiillu nutaaliaasut toqqissisimasullu pilersinniarlugit, inatsisinik atuutsitsinermit tunngasut oqallinnitsinni pingaartinnerusariaqarpagut.

Naalakkersuisut maannakkut inatsisinik atuutsitsinermit tunngasunut periusissiuleruttoq. Naalakkersuisut inatsisinik atuutsitsinermit tunngassutigut tulleriissaanerata pillugu innuttaasunut suleqatinullu erseqqissumik attaveqarnerata qulakkeerneqarnissaa periusissiami siunertarineqarpoq.

Ukiap ingerlanerani periusissiap tamanut saqqummiunneqarnissaa naatsorsuutigineqarpoq, taamalu periusissiamik suliaqarneq aallartereerpoq. Taamaattumik inatsisinik atuutsitsinermit tunngassutigut pitsaanerulersitsinissamik oqallinneq manna piffissamik eqquilluarpoq. Oqaaseqaatit nassuiaatillu Inatsisartunit saqqummiunneqarumaartut Naalakkersuisut qilanaaraat taakkualu periusissiap suliarinerata nanginnerani ilanngunneqassapput.

Inatsisinik atuutsitsinermit tunngasutigut siuariarnermik pisoqareersimavoq, ilaatigut Justitsministerie-qarfimmi atlantikup avannaanut allaffittaarsimapput. Tamatuma saniatigut Nuummi matoqqasumik isertitsivik ammarneqangajalerpoq, kalaallit parnaarussassanngorlugit eqqartuunneqarsimasut ilaqtatik, kulturertik oqaatsitillu qanillugit, Herstedvesterip Paarnaarussivianiinnatik maani parnaarussaasinnaalissallutik.

Ilorraap tungaanut ingerlavoq, kisianni suli annertuumik pitsanngorsaasoqarsinnaavoq. Assersuutigalugu eqqartuussivinni equngassuteqarnerit takusarpavut, illersuisoq inatsisinut tunngasutigut pikkorissarnermik sivikitsumik tunuliaqutaqartarpoq unnerluussisorlu illersuisumit pitsaanagerusumik ilinniagaqartarluni saniatigullu politiit aqutitigalugit inatsisilerinermik sulisunik ilinniarsimasunik atuisinnaalluni. Taamaattumik illersuisutut atorfimmut annertunerusumik pitsaanagerusumillu ilinniarsimasumik pisariaqartitsisoqarpoq.

Ilanngullugu pissutsit atukkagut imaapput inatsisit atuuttut, inatsisinut atuutsitsinermut tunngassut eqqartuussivinnilu suleriaatsit, innuttaasumut illersuisunullu, pasineqartup illersorneqarnerani najukkami eqqartuussivinni siullermeerluni eqqartuussisoqartussaaitillugu illersuisussanut, paasiuminaatsorujussuusinnaasarlutik.

Saniatigut, inatsisinik atuutitsinermi inatsisiliarineqartartut amerlasuut nassuiaatinik imaqarneq ajorput, eqqartuussivimmik atuisup inatsisit aalajangersagartaasa tunuliaqutaat siunertaallu paasilluarsinnaajumallugit atorsinnaasaanik.

Danskit inatsisaat assigiinngitsunik aaqqiissuteqarfigiinnariarlugit ilaaginnassannginnatsigit pingaaruteqarpoq. Naalakkersuisut pingaartippaat, inatsiseqarneq inuiaqatigiissutsitsinni pissutsinik innuttaasullu eqqortuutitatus misigissusaanni ersersinneqassasoq, inatsinillu atuisut, kalaallit nunaannut atatillugu inatsisit siunertaannik paasinnissinnaassasut.

Inatsisinik atuutitsinerup iluani pitsaanerulersinneqartariaqartut immikkoortut pingaarutillit allat ilaatigut makkuupput, pinerlutsaaliuisitsinermik suliani aamma inuusuttunut allatut pineqaatissiissutit soorlu assersuutigalugu aaqqiagiinngittarnermut siunnersuisooqatigiit. Aammattaaq nalinginnaasumik pinerlunnermik eqqugaasut ikiorneqarnerat ukkanneqarnerusariaqarpoq.

Naalakkersuisut isumaqarput, pingaarnertut inatsisinik atuutsitsinermut tunngassut aningaasaliissutinik amerlanerusunik pilersornissaat pisariaqartinneqartoq kiisalu naalackersuinikkut oqallinnermi pingaarnersiorneqartariaqartut.

Taamatut oqaaseqarlutik Naalakkersuisut oqallilluarnissamik kissaassipput.